

Pasero

I

Pos de chantar m'es pres talenz,
farai un vers, don sui dolenz:
mais non serai obedienz
en Peitau ni en Lemozi.

II

Qu'era m'en irai en eisil:
en gran paor, en gran peril,
en guerra laisserai mon fil;
faran li mal siei vezi.

III

Lo departirs m'es aitan greus
del seignorage de Peiteus
en garda lais Folcon d'Angeus
tota la tera son cozi.

IV

Si Folcos d'Angeus no·l socor,
e·l reis de cui ieu tenc m'onor,
faran li mal tut li plusor,
felon Gascon et Angevi.

V

Si ben non es savis ni pros,
cant ieu serai partitz de vos,
vias l'auran tornat en jos,
car lo veiran jove mesqui.

VI

Per merce prec mon conpaignon:
s'anc li fi tort, qu'il m'o perdon;
et il prec En Jezu del tron
en romans et en son lati.

VII

De proeza e de **joven** fui,
mais ara partem ambedui;
et ieu irai m'en a Cellui
on tut peccador troban fi.

VIII

Mout ai estat cuendes e gais,
mas Nostre Seigner no·l vol mais;
ar non puesc plus soffrir lo fais,
tant soi aprochatz de la fi.

IX

Tot ai guerpit cant amar sueill:
cavalaria et orgueill;
e pos Dieu platz, tot o acueill,
e prec li que·m reteign·am si.

X

Totz mos amics prec a la mort,
que·i vengan tuit e m·onren fort;
qu·ieu ai agut joi e deport
loing e pres et e mon aizi.

XI

Aissi guerpisc joi e deport,
E vair e gris e sembeli.

- letto 710 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/pasero-7>